



dobaussen. An dat, wat Der ugedeit hutt, dat stëmmt mech schonn zum Deel positiv.

Dir hat effektiv de Pech, Här Minister, d'Reform vun Ärem Virgänger, dem Här Schneider, ëmssetzen ze mussen.

Virop, Här President, wëll ech awer vun dëser Plaz am Numm vun der CSV och e ganz grouse Merci un eis Policebeamten an d'Ziviliste soen, déi besonnesch och während der Kris net ëmmer en einfachen Job hunn an déi alles gemaach hu fir d'Sécherheet an d'Wuel vun eis alleguer. Dofir op dëser Plaz e grouse Merci!

D'Fro, déi sech stellt, Kolleeginnen a Kolleegen: Huet d'Regierung hier Versprieche kënnen hale mat dësem neie Policegesetz? Fir mech sollt dës Policereform dräi Haaptziler verfollegen: éischtens, méi Leit, zweetens, eng verbessert Presenz um Terrain, an drëtzens, e moderne Management.

Ech soen et direkt, fir datt d'Spannung net ze laang dauert: Méi Leit an eng verbessert Presenz um Terrain sinn nach laang net erreecht ginn. Méi no beim Bierger sollt d'Police sinn duerch d'Zesummeleeë vu Kommissariater. Jo, d'Zesummeleeung ass geschitt, well dat war dem Här Schneider seng Relioun, d'Zesummeleeën! Doduerch ass a villen Uertschaften eng Ulafstell fir Bierger verschwonne, a besonnesch am ländleche Raum. Et ass eis reegelrecht agetriichtert ginn, datt d'Zesummeleeung keng - keng! - negativ Konsequenzen hätt, well méi Leit doduerch um Terrain wieren.

Fakt ass: Dat ass net richtig geschitt. Dir, Här Bausch, hutt am Juli 2019 e Rekrutementsplang virgeluecht. Et sollen 847 Leit bannent dräi Joer ageallt ginn. D'Fro: Vu wou sollen déi all kommen? Oder huet dem Här Schneider seng nei Gesellschaft eng Maschinn entwéckelt, fir Polizisten ze klonen?

Mee komme mer fir d'éischt emol zu de positive Punkten, Här Bausch! Déi nei Organisation vun der Generaldirektion, dat heescht just nach een Direkter an een Adjoint mat véier Zentraldirektionen, hu mer begreist, gradso wéi d'Reduktion vun de Regionen. Domat hätt ech eng Äntwert ginn op déi zwou éischt Froen.

Déi nei Mesurë vun der Police administrative, wéi de Sécherheitsperimeter, d'Identitéitskontrollen, d'Fouillen, d'Zoumaache vun Etablissements, administrativ Saisien an d'Detention begrësse mir. Betreffend d'Fouillë vu Persounen, do erënneren ech drun, datt de Projet de loi nach an der Commission de la Justice hänkt.

Dann, endlech - endlech! - ass och d'lescht Joer am Mäerz eng Autorisation komm fir d'Erweiterung vun der Kameraiwwerwaachung am Garer Quartier, Madamm Buergermeeschtesch. De Projet VisuPol ass an der Kommissioun virgestallt ginn a geet fir eis och an déi richteg Richtung. Jo, mir sinn eis eens: Eng Kameraiwwerwaachung ass keen Allheilmittel, mee an der Policeaarbecht geet et och ëm Ofschreckung. A sou eng Kameraiwwerwaachung kann dach déi kleng Truanden drun hënneren, eng ze stiichten.

An deem Kontext kommen ech och net derlaanscht, nach eng Kéier d'Problematik am Garer Quartier unzeschwätzen, Här President. Déi hat jo d'lescht Joer fir vill Opreegung gesuergt an no Biergerversammlung, no politischem Drock och vun der CSV sinn eng 20 Polizisten an de Garer Quartier versat ginn. Jo, et ass du besser ginn. Wat awer net gesot ginn ass, ass, datt déi 20 Poliziste vun enger anerer Plaz ofgezu an déi erëm do feelen.

D'Testphas fir d'Bodycamen ass vun der CSV guttgeheescht ginn, Här Minister. Wat fir eng éischt Konklusionen zitt Der doraus?

Da wollt ech lech och nach eng Kéier no den aktuelle Statistike vun der Kriminalitéit froen, well trotz intensive Recherchen hunn ech keng aner fonnt wéi déi vun 2018. Vlächent kéint Der e Wuert doriwwer verléieren.

Dann zu engem Liblingstheema vun der CSV: de Platzverweis. An ech spieren - ech spieren! -, den Här Minister ass um gudder Wee, deen als Realpolitiker ze iwwerhuelen. Wat sinn ech geschleef ginn, wéi ech hei fir d'CSV de Platzverweis gefuerdert hunn: „Antisozial!“, „Dee Gloden, deen ass géint déi kleng Leit!“!

An haut stelle mer fest, datt d'Policedirektion aus dem Zentrum dee Platzverweis freet. Den SNPGL freet de Platzverweis. An ech hunn hei e Bréif un d'Madamm Buergermeeschtesch vun der Policedirektion. Déi soen, op Opfuerderung vun der Madamm Buergermeeschtesch aus der Stad, datt et inakzeptabel ass vun der Mendicité organisée, an Dir hutt et selwer gesot, hei d'Diere vun de Geschäfte zouzesetzen.

Do muss agéiert ginn! A si biedelen eis fërmlech un an deem Bréif, d'Police, hinnen dach déi gesetzlech Moyenen ze ginn. An de Platzverweis ass ee Moyen, fir dat doten ze reelegen.

Ech sinn deemools hei vum Minister an de Buedem gestampft ginn. An ech widderhuelen nach eng Kéier: Den Här Schneider wollt d'Leit fir zwielef Stonnen ewechspären. Mir fuerdere just, datt een d'Leit kann opfuerderen, sech vun där Plaz fortzebeweegen. Wat ass méi sozial?

Zum Comité de concertation: Do si mer d'accord, fir déi alljärelech obligatoresch Reunion tëschent dësem Komitee an den Autoritéite bäizebehalen.

Dann hutt Der och eng interessant Fro gestallt iwwert d'Moralitéit fir d'Memberen am ziville Kader. „Moralitéit“ ass e groust Wuert. Jiddwereen interpretéiert do eppes anescht. Mir sinn der Meenung als CSV, datt een dat soll maachen, awer am Respekt vun dem Dateschutz. An eng Pist kéint den Text vun der ANS sinn, wou mer laang an der Kommissioun driwwer diskutéiert hunn, wéi een déi Leit kéint screenen. An do hu mer jo och elo en Accord fonnt, wéi een dat am Respekt vum Dateschutz a proportional kann duerchéien.

Och favorabel, Här Minister, sti mer zu der Iddi vum Statut vum OPJ, fir datt deen op aner Membere vum ziville Kader kann erweidert ginn. Awer nëmmen do, wou déi Pouvoiren och gebraucht ginn. Ech erënneren drun an ech mengen, do ass och eng Unanimitéit an dësem héijen Haus: Mir wëlle jo net weider déi Flutwell vu penalen Dispositionen erweideren.

Vill Ministeren, Justizministeren hate schonn déi Iddi. An ech mengen, et ass och e Wunsch vun dësem Haus do, fir eng Kéier duerch de Code pénal ze goen, fir ze kucken: Muss wierklech allkéiers eng penal Sanktioun do sinn? Kann et net och eng Kéier eng administrativ Sanktioun sinn? An dat muss eebe parallel dann zu der Erweiterung oder Neterweiterung vum Statut vum OPJ geléist ginn.

Fir dann op déi néngt Fro anzegoen: Fir d'Direktion a Richtung vun engem Centre de compétence et de gestion du personnel, Här Minister, hutt Der eis Ennerstëtzung.

Mir sinn iwwregens och der Meenung, datt de Comité d'accompagnement eng gudd Initiative ass. Déi geet jo och zrëck op de fréiere Minister Halsdorf.

### (Interruption)

Dann - ech sinn an der Hallschent vun der Ried - kommen ech elo zu den negative Punkten.

Ech hat et gesot: D'Zesummeleeën an d'Ofschaf vum verschiddene Polizeikommissariater, besonnesch am ländleche Beräich, ass deemools vu ville Parteie kritiséiert ginn. An - an Dir gitt et awer zou, Här Minister - et huet nach net déi Verbesserunge bruecht, déi eis versprach gi sinn.

Et ass wuel richtig, datt ëmmer elo een um Büro ass. Dat ass richtig, mee wat net gesot gëtt, ass, datt de geografeschen Territoire vun deene verschiddene Kommissariater weesentlech méi grouss ginn ass, besonnesch vun deenen, déi 24 Stonnen a 7 Deeg op 7 op hunn. Wat bréngt et, wann ech een oder zwee Leit um Kommissariat hunn, souguer zwou Unitéiten, déi dobausse patrulléieren, an et geschitt eppes an enger Géigend vun der Region, wou da keen do ass? Dat muss an Zukunft besser organiséiert ginn. Jo, mir kommen net derlaanscht, méi Leit ze rekrutéieren. Dat ass d'ailleurs och ganz kloer den Avis vum Syvicol, dee jo bei där Nott vum Här Minister Bausch derbailouch.

De façon générale, muss ech och soen, kréie mer vu Biergerinnen a Bierger oft gesot, wann een op e Policekommissariat geet, datt se oft gesot kréien: „De Beamten ass haut net do, dee fir deen dote Volet zoustänneg ass. Kommt eng aner Kéier zrëck!“ Jo, an Dir hutt et ugeschwat, et gëtt d'Méiglechkeet, fir eng Plainte iwwer Internet eranzerechen, de sougenannte virtuellen E-Kommissariat. Et gräife vill Bierger op dës Method zrëck, fir eng Plainte en ligne ze maachen, mee wéi, Här Minister, ass et mam Suivi? Hei hätt ech gär konkret Zuelen.

### 9. Dépôt d'une proposition de loi par M. Léon Gloden et M. Jean-Marie Halsdorf

A vu datt d'Proximitétsaarbecht fir d'CSV um Terrain extreem wichteg ass, deposéieren ech och eng Proposition de loi, déi eis dräi Amendementer zrëckhëlt, déi mer deemools am Kader vum Gesetz an der Kommissioun schonn abruucht haten:

Den Term vun der Proximitéit an d'Gesetz ze schreiwen - dat stoung am Gesetz vun 1999, dat ass verwässert ginn am Gesetz vun 2018. D'ailleurs gi mer do och ennerstëtzt vum SNPGL.

An da froe mer an där Proposition de loi de Platzverweis nach eng Kéier. An ech spieren hei: D'Madamm Buergermeeschtesch, déi géif dat am léifste matënnerschreiwten.

An da froe mer nach eng Kéier déi véiert zousätzlech Antenn fir d'Hauptstad, well et ass einfach e Fakt - dat ass esou! -, datt d'Drogekriminalitéit eeben an enger grousser Stad weesentlech méi prononcéiert ass. Trotz all deene soziale Mesuren, déi déi politesch Responsabel vun alle Parteien huelen, gëtt et se. An et dierf een d'Ae virun där Problematik net zoumaachen.

**7589** - Proposition de loi portant modification de la loi du 18 juillet 2018 sur la Police grand-ducale et portant modification :

1° du Code de procédure pénale ;

2° de la loi modifiée du 9 décembre 2005 déterminant les conditions et modalités de nomination de certains fonctionnaires occupant des fonctions dirigeantes dans les administrations et services de l'État ;

3° de la loi du 10 décembre 2009 relative à l'hospitalisation sans leur consentement de personnes atteintes de troubles mentaux ;

4° de la loi modifiée du 25 mars 2015 fixant le régime des traitements et les conditions et modalités d'avancement des fonctionnaires de l'État ;

5° de la loi du 18 décembre 2015 relative à l'accueil des demandeurs de protection internationale et de protection temporaire, et modifiant la loi modifiée du 10 août 1991 sur la profession d'avocat ;

et portant abrogation :

1° de la loi du 29 mai 1992 relative au Service de Police judiciaire et modifiant

1. la loi modifiée du 23 juillet 1952 concernant l'organisation militaire ;

2. le Code d'instruction criminelle ;

3. la loi du 16 avril 1979 ayant pour objet la discipline dans la Force publique ;

2° de la loi modifiée du 31 mai 1999 sur la Police et l'Inspection générale de la Police

### 10. Débat de consultation sur la mise en œuvre de la réforme de la Police grand-ducale (suite)

#### Débat (suite)

Dann en zweete Punkt, Här Minister: Wéi oft hunn ech gefrot, datt ee sech soll Gedanke maachen, wéi ee ka mat Hëllef vu moderner Computersoftware d'Policeaarbecht ennerstëtzen, jo, erliichten? Ech hu wéi oft gefrot, datt een eng Software test. Et gëtt zum Beispill de PRECOBS, deen erausfënnt, wann an engem Quartier en Iwwerfall geschitt, wéi héich d'Probabilitéit ass, datt an deenen nächste Stonnen erëm eppes geschitt.

Ganz konkret war dat zu Mamer de Fall vun engem Bierger, deen hei an dësem Sall sëtzt a wou d'Police effektiv zu deem gesot huet: „Mee mir waren dach eréischt bei lech an der Parallellstrooss a mir hätte kënnen direkt bei lech sinn.“ De PRECOBS-System hätt dat direkt ugewisen.

Dann zu den Taseren: Do fuerdere mer nach eng Kéier en Essai mat den Taseren. An Dir wësst, Här Minister, den Direkter ass och 100%eg vun der Effikassitéit vun dësem Moyen iwwerzeegt.

Dann zu der Kompetenzerweiterung vun den Agents municipaux. Dat ass net Äre Beräich, mee et huet awer eppes mat dëser Debat ze dinn, well och mir als CSV - an, ech mengen, dat ass unisono hei d'Meenung vun dësem héijen Haus - sinn der Meenung: Mir müssen d'Polizisten entlaaschte bei den administrativen Aarbechten. An ee Punkt dovunner ass, fir den Agent-municipale méi Kompetenz ze gi mat der adequater Formation. Och do si mer laang amgaang um legislative Wee. Mee ech muss awer och hei der Madamm Inneministesch eng Datz ginn, well no den Avis vum Staatsrot 2018 hu mer näischt méi héieren.

#### (Interruption)

An ech hunn hei d'Impressioun, datt d'Madamm Inneministesch déi selwecht Vogel-Strauß-Politik mécht wéi an dëser Kris: „Léiwer net de Kapp aus dem Buedem zéien, soss muss ech dach op eemol Decisiounen huelen!“

Dann zu de Rekrutementen - an, Här Minister, Dir hutt et ugeschwat -: Dat ass dee ganz groussen Defi, och opgrond vum Wuessum vun dësem Land! Mee dëst Gesetz huet dee bis elo net geléist. Mir begrëssen, datt Dir, am Contraire zu Ärem Virgänger, méi e konstruktiven Dialog mat de Policegewerkschaften a mat de Leit um Terrain féiert. Dat kréien ech oft gesot an dat soll een och eng Kéier hei soen.

► **Mme Lydie Polfer (DP).**- Très bien!

► **M. Léon Gloden (CSV).**- Den Här Schneider konnt seng Versprieche net halen, well hien hat gesot, tëschent 2016 an 2018 géifen 346 Polizisten ageallt ginn. Ech wëll just hei e puer Zuelen nennen: Den 1. Januar 2016 hate mer 2.199 Polizisten. Den 1. Januar 2017 hate mer der 2.284, dat war e Plus vu 85. Den 1. Januar 2018 hate mer der 2.341, e Plus vu 57. An den 1. Januar 2019 hate mer der 2.354, dat ass e Plus vun 13 Polizisten.

Ech hunn, Här Minister, Äre Plan de recrutement hei schonn eng Kéier ugeschwat. Dat ass en Challenge. Ech hoffen, Dir packt et, Dir kënnt Är Versprieche aléisen, well soss, muss ech soen, ass et wéi bei der Klimapolitik: Mir stiechen eis héich Ziler, mee d'Weeër fir dohinner sinn oft onbekannt.

Et gëtt dann och Problemer vun der Rekrutierungspolitik an deene verschiddene Karriären. Et ass och ugeschwat ginn, besonnesch dee Problem, deen oft och an der Press war a bei deem mir als CSV och eng Rei Questions parlementaires gestallt hunn: Dat ass déi Problematik vun de Karriären C1 a B1, wann ee vun der C1 op d'B1 eriwuergeet. Do komme lo eng Rëtsch Leit méi schlecht ewech. An ech mengen, do ass am Ufank och schlecht kommuniquéiert ginn. Et ass mer gesot ginn, datt een awer do probéiert, an Dir hutt dat jo och hei ugedeit, fir eng Léisung ze fannen. Well et soll een d'Leit d'selwecht behandelen. A mir ennerstëtzen lech an där Demarche.

Dann och betreffend d'Ëmsetzung vum Juge-ment iwwert d'Hors-cadren, do haten den Här Spautz an ech, mengen ech, véier Question-parlementaire gestallt. Do waren d'Äntwerten ëmmer zimmlech vag, Här Minister. An duerfir froen ech dann och elo hei konkret, wéi d'Léisung ausgesäit, fir datt mer dee Problem och geléist kréien. Well all Rekrutementsproblem intern an engem Corps, dee ka geléist ginn, dréit zur Satisfaktioun an zur Begeeschterung vun deene Leit bäi, fir hiren Job auszeüben.

Dann, wat mer och besonnesch um Häerz läit, ass déi Problematik vun de CDDen, vun den Zivilisten am Corps. Ech weess, et ass net einfach an engem Corps wéi der Police, Zivilisten ze integréieren. Mee do musse béid Säfte bereet sinn openeenzegeen. Mee wat ech net gutt fannen, ass, datt esou vill CDDen do gemaach ginn, besonnesch bei dem Secteur public, deen dem Privatsektor ëmmer mam béise Fanger seet: „Keng CDDen, mee CDlen!“, a mir ginn hei als Staat da CDDen. Do ass Verbesserungsbedarf, Här Minister, fir deem do entgéintzewierken.

Dann, wann een de Leit och nolauschtert, kritt een oft gesot, datt d'Police judiciaire de grouse Perdant vun dëser Reform wier, besonnesch och am Rekrutement. An ech wollt och do den Här Minister froen, wat hie vum Recrutement direct fir d'Police judiciaire hält. Dir hutt et kuerz ugedeit.

Ech kennen d'Problematik och aus mengem Beruff e bëssen, als Affekot kritt een dat och alt mat. An et ass wierklech wichteg, datt mer besonnesch do e Recrutement direct maachen, wéi zum Beispill bei der Lutte géint d'Criminalité financière, wou Der wierklech Experten aus dem Privatsektor kéint siche goen, mee och d'Police judiciaire als Corps am Corps weiterentwéckelen. Well et ass eng eminent wichtig Funtion vum Rechtsstaat a soumat vum Sécherheitsgefill vun de Leit dobaussen.

Da gëtt am Document préparatoire och eppes Positives ervirgestrach: Dir hutt gesot - an dat freet mech -, d'Relatioun mat den Autorité-judiciäir wiere méi effizient ginn. Dat ass eng gutt Nouvelle.

Betreffend den Organigramm vun der Police judiciaire: Dee bleift awer nach leider onkloer. An aus deenen Avis vum deene verschiddenen Organer, déi bei där Note préparatoire ugehaange waren, konnt een och liesen, datt d'Leit am Fong bedauern, datt déi Aarbecht, déi déi fréier SCRECe gemaach hunn, ennergeet. Dat heescht, eng proaktiv Aarbecht um Terrain, fir der Kriminalitéit preventiv entgéintzewierken, dat ass net méiglech am Kader vun deem neie Gesetz, oder besser, doduerch, datt net genuch Leit do sinn.

An da si mer erëm bei der Preventioun um Terrain, bei de Leit. An och dat huet zum Beispill d'Association professionnelle du cadre supérieur ervirgestrach, do gëtt souguer vun engem „vide opérationnel“ am Kampf géint déi lokal Kriminalitéit geschwat. Här Minister, dat si Wierder, déi d'CSV net gär héiert. An do muss onbedéngt nogebessert ginn! D'Preventioun ass den A an O vun enger effektiver an effikasser Sécherheitspolitik an engem Rechtsstaat.

Dann nach zwee aner Punkten. Här Bausch, Dir waart ëmmer de grouse Fervent fir d'Policekontrollen an den Zich, déi sougenannt „Unité spéciale“. D'Kolleegin Octavie Modert hat zum